



**Condicionnan cu ta valido pa tur operador**

Di acuerdo cu  
Isabelle Dammers (DIP)

**Lo no core  
ningun  
hende for  
di beach,**

pero mester wordo reglamenta

**SIMAN** pasa, DIP tabatin diferente reunion e.o. uno cu tur departamento cu tin di haci cu e Beach Policy, unda a splica e lifia di maneho, e esencia, cu ta un modelo, esta ki area lo usa riba nos beachnan.

A splica con e implementacion lo tuma lugar, e trabaonan cu tin di haci pa por implementa esaki den lunanan cu ta bin.

Tabatin reunion despues cu e stakeholdernan, cu ta involvi. Unda invita nan representantenan, segun sra. Isabelle Dammers.

E siman aki, lo tin un reunion specifico pa tende e preocupacion di e operadornan di watersport. Tin pier riba e strip ey, cu tin derecho pa huur esakinan, tin operadornan di watersport cu tin localidad riba tereno di e hotelnan. Esey no ta competencia di DIP.

E lifia di maneho ta traha y dirigi riba e tereno erfpacht pafo di e hotelnan. P.e. for di cant'i laman, dependiendo con hanco e beach ta.

Un area di como 10 pa 25 meter, mester keda completamente bashi, es decir sin nada riba dje. Tambe tin for di banda di caya, tin un area cu lo permiti facilidadnan, pa regla e amout di cosnan cu hotel tin poni eynan.

Tur cos mester move p'e areanan cu ta parti di e erfpacht cu e hotel tin. Pero lo demas, e beach mester keda liber, pasobra e beach ta keda publico.

Tin caminda p.e. tin operadornan cu ta mei-mei di e hotelnan, cu lo ta un corridor, pa cual mester tin un verschuiving, pero lo papia cu e operadornan di watersport pa tuma decision con esaki lo bira. E presion riba cierto area di beachnan ta causa frustracion, pa cual mester di cambio. Tur cambio ta causa disgusto, pero e final mester ser mira, con por crea un facilidad cu no ta causa daño na nos turismo.

Ta for di 2009, ta atende e asunto aki, pero te awe no por keda cla, segun Isabelle Dammers. No a kita ningun hende for di beach, a tolera esey te awor. Mester bin un restructuracion pa tur hende. E punto di salida ta cu nos beachnan ta keda pa publico.

E intencion lo no ta pa kita ningun hende for di beach, pero ta bay bin reglamente, pasobra tin varios operadornan di watersport y mas, cada uno tin diferente tipo di permiso.

Lo trata tur hende mescos. Lo bin un solo permiso, cu condicionnan cla pa tur hende. Y eyden lo tin e.o. regla di comportacion pa tur hende, segun Isabelle Dammers.